

欽定續通志



欽定續通志卷一百三十

職官略一

臣等謹案鄭志職官略本杜典而刪潤之以唐六典爲準溯前古三代秦漢以來設官之制存其累代相因者而于後世所不置者則闕焉粵惟帝王設官分職因時制宜不相沿襲自雲鳥紀官五鳩九扈之職因事更名虞之四岳九官夏之邇人官師主夫嗇人陶正車正殷之六大五官六府六工名爵遞更典司亦異記曰有虞氏官五十夏后氏官百殷二百蓋官制若是其不相沿也卽以周官考之六官分治爲廟公致太平之書而春秋傳所載王朝列國諸官如周有御士尉氏魯有左宰周人晉有執秩元尉齊有舟鮫祈望宋鄭皆有褚師以及楚之莫敖右尹箴尹芊尹秦之不更庶長皆爲周禮所無因時創置在一代之中已不能無變更矣而況秦漢以後九寺三省之分設州部軍府之輕重代有增損或仿周官或仍秦制或創新名繁簡異宜裁併異制必不能据周官漢百官志以強配魏晉南北朝之設官亦必不能据唐六典以傳會周秦之分職但以宋代建官率因唐舊故鄭志原本杜典詳于近而略于古亦著作之體宜爾也攷唐自肅宗至德以後藩鎮日重名器漸紊五代事多草創至宋神宗元豐間更定官制猶存六典之遺意然損益多寡不必盡合于唐矣至如遼之北面官金初建國之貝勒等官元之侍正府中政院內宰司承徽寺經正監明之督理侍郎協理戎政總理撫治諸職皆前所未有而各爲創置者也宋以中書舍人與翰林學士分典制誥謂之兩制而明之兩房舍人爲內閣之屬宗正寺舊列于諸卿而明之宗人府居文職之首主事舊爲令史至明則與郎中員外郎同爲六部郎官巡檢在宋爲邊徼典軍之要職而元明則屬于州縣宋之安撫司宣撫司元之宣慰司多領以大臣統理軍民總轄郡縣而明則授諸土官此前

後名實之不相因也其餘內外之遷移班秩之崇卑委任之繁省五朝制度彼此互殊視唐以前爲尤甚夫鄭志之述唐官制祇取近代章程備當時法鑑未嘗以六典爲至當不可易之圭臬則後之述官制者又奚必一一傳會六典勉強以求合哉且如殿閣大學士自明以來爲宰輔之任而唐六典則無之太尉司徒司空古稱三公近代久不復置中書門下唐宋謂之政府至明僅存舍人給事中而已樞密院始于五代權在宰相之右宋與宰相稱兩府遼金元皆爲重任至明乃革略舉其大端已難強以相附此亦如封建郡縣古今異宜必欲舉春秋侯國之封域以配合唐之十道宋之二十三路明之兩京十三布政司多見其拘而鮮通矣茲續修職官略始自唐中葉訖於元明上下八百餘年沿革不同自毋庸更襲六典之舊惟是建官列職一代有一代之規模若專據近代以溯往古則凡宋遼金元之官明代所不設者皆闕而不載又未免挂漏之病今參酌古今取其大略相因者區而別之曰唐五代宋官制曰遼官制曰金元官制曰明官制次第列陳不漏其中或名稱雖異而職守相同或名目似同而崇卑攸別詳加案語以通古今之郵以存通史之例若一代所刪置後世無相同者亦按時代增入以存當日之掌故其祿秩官品各門仍依鄭志之例總其大綱載于序官之後焉

唐五代宋官制上

唐以六典設官三省九寺六軍十六衛諸司一代無所更易肅宗至德以後國有重事輒以宰相兼領其官崇儒學則爲集賢大學士理財用則兼鹽鐵轉運使治軍旅則領行營都統至太微宮使太清宮使皆爲榮寵之任又增置樞密院使掌內外表奏傳宣出納其時方鎮之有功者多加平章事至僖宗光啟間率加司徒司空藩鎮之重極於唐末非復六典之舊矣五代多仍唐制以同中書門下平章事爲宰相昭文館大學士集賢殿大學士監

修國史皆以宰相分領之其三省六曹諸司則因而不改惟梁改樞密院爲崇政院親信大臣知院事後唐復爲樞密院領自宰相凡軍國機務兵防邊備之政悉領爲至總理諸司則歸諸宣徽院經治財賦則責之三司使職任之重亞於樞密然五代典章散佚三公赴上不備其儀而藩鎮多領三省長官及三公三師之職其信任惟六軍馬步都指揮使左右控鶴都指揮使復有龍捷左右軍虎捷左右軍左右廂都指揮使隨時更名得親近者卽爲重任又後置端明殿學士掌四方章奏佐樞密使所未逮亦因時而立制也宋初參用唐五代之制尙書門下並列於外別置中書禁中爲政事堂與樞密對掌大政天下財賦內庭諸司中外筦庫悉隸三司臺省寺監官無定員無專職皆出入分泄庶務故三省六曹二十四司類以他官主判其官人受授之別則有官有職有差遣官以寓祿秩敘位著職以待文學之選而別爲差遣以治內外之事其次又有階勳爵邑以分差等外官則懲唐以後藩鎮之專恣頗用文臣知州事復設通判以貳之凡一品以下謂之文武官未嘗參者謂之京官樞密宣徽三司使副學士諸司而下謂之內職殿前都校以下謂之軍職外官則有親民釐務二等而監軍巡警皆比親民之任焉神宗熙寧末始命館閣校唐六典元豐三年以摹本賜羣臣乃置局中書命官詳定遂肇新官制省臺寺監領空名者一切罷去而易之以階及詳定所上寄祿格明堂禮成卽用新制遷秩而省臺寺監之名各還所職矣五年省臺寺監法成六年尙書新省成帝親臨幸召六曹長貳以下詢以職事因誠勅焉哲宗元祐以後二府不分班奏事樞密加置簽書戶部則不令右曹專典常平而總於其長起居郎舍人則通記起居館閣則增置校勘黃本稍更元豐之制高宗南渡復討論元豐故事而加潤色然政尙權宜如御營使國用使諸職宰相執政並有兼官因事勦名殊非經久諸部或長貳不並置或併郎曹使相兼之唯吏部戶部不省不并後乃稍爲增置繼又

增館閣之員廣環衛之官釐正庶務蓋自元豐定制以後屢議增損然于大而分政任事之臣微而筦庫監局之官便于時政者沿襲不革猶存六典之遺也

臣等謹按唐六典設官之先後與夫內外諸司之職掌詳見鄭志歐陽修五代史不志職官其散見于紀傳者參考五代會要諸書略存梗概惟宋史職官志以唐典爲本于宋時增設之官依類分見條理整齊今據宋代官制以上溯唐至德以後及五代之設官沿革俾前後相通且不使增置各官有所闕略焉其官秩次第亦以宋史爲敘

三師

太師太傅太保

唐制三師不常置至德以後太傅太保多爲藩鎮勳臣及宰輔優禮之官唯太師不輕授五代仍唐制宋初爲宰相親王使相加官其特拜者不預政事赴上於尚書省徽宗政和三年以太師太

傅太保爲三公

三公

太尉司徒司空

唐制三公非有大功者不授五代多爲藩鎮加官及贈官宋初仍唐制其特拜者赴上儀與三師同凡除授則自司徒遷太保自太傅遷太尉政和三年罷太尉司徒司空不置

三孤

少師少傅少保

五代皆不置宋政和三年八月始三孤亦稱三少爲三次相之稱

臣等謹按公孤之職昉自周官唐六典仍漢制以太尉司徒司空爲三公亦曰三司而周官之三公則號爲三師後遂因而不改宋政和中詔以司徒司空周六卿之職太尉秦主兵之任皆非三公並宜罷之仍者周制並建三公三孤于是公孤之名始正然宣和之末三公至十八人而鄆王楷肅王樞皆以皇子出閣爲太傅太保識者譏

其非制乃改授他官後復置太尉為武階之首秩在節度使上非復三公之任矣

宰相唐制侍中中書令為宰相至德以後宰相仍稱平章事五代以中書門下兩侍郎同中書門下平章事為宰相宋承唐制以同平章事為宰相無常員有二人則分日知印上相為昭文館大學士監修國史其次為集

賢殿大學士或置三三相則昭文集賢學士與監修國史並除元豐更制以侍中中書令尚書令官高不除而以尚書左右僕射為宰相左僕射兼門下侍郎行侍中之職右僕射兼中書侍郎行中書令之職政和中改左右僕射

為太宰少宰仍兼兩省侍郎欽宗靖康中復改為左右僕射遇災三年詔左右僕射並加同中書門下平章事孝宗乾道八年改左右僕射為左右丞相

參知政事唐制宰相亦稱參知政事五代不置宋太祖乾德二年始置以副宰相不押班不知印不升政事堂開寶六年詔參政于都堂與宰相同議政事太宗至道元年詔宰相與參政輪班知印同升政事堂押班

齊衡行並馬元豐更制廢參知政事以門下中書省二侍郎尚書左右丞代之建炎三年復置參知政事

平章軍國重事唐制宰相亦稱平章軍國重事宋元祐二年特置以優碩德老臣後不恒置徽宗開禧元年改稱平章軍國事

臣等謹案唐初以三省長官為宰相復以三省事相統制乃設官參掌以要其成其見于唐書宰相表者如知政事平章政事參知政事平章軍國重事名稱不一要皆宰相之任肅宗以後宰相皆稱平章事至宋則以參知政事為平章事之佐而平章重事則以優禮文彥博呂公著而特置雖仍唐代之名而職任稍殊矣乾道中改設左右丞相以正宰相之名當時葉適嘗謂名雖正而委任不得其人仍無益於治夫左右輔弼祇以布職分猷共襄治理如其事權旁寄無論謂之丞相謂之平章事皆能竊政柄以自專故道揆之任不在乎輕重其名而在審其實也論者稱其切于時政焉又唐中葉後藩鎮多領平章事五代因之宋制親王樞密使留守節度使兼侍中中書令同平章事者皆稱使相不預政事不書敕惟宣敕除授敕尾存其銜亦尚仍唐末之制也

門下省

侍中唐至德以後侍中不常置五代為藩鎮加官宋制侍中一人掌佐天子議大政審中外出納之事以官高罕除元豐更制以左僕射兼門下侍郎行侍中職別置侍郎以佐之南渡後省侍中不置

門下侍郎唐肅宗乾元元年改門下侍郎為黃門侍郎代宗大歷二年復為門下侍郎五代時多以宰相兼之宋制侍郎一人掌貳侍中之職省中外出納之事為執政官南渡後不置

左散騎常侍左諫議大夫唐制左散騎常侍二人左諫議大夫四人德宗建中二年改諫議大夫一人為知樞使五代亦置左散騎常侍左諫議大夫宋制左散騎常侍左諫議大夫各一人與司諫正

言同掌規諫諷諭以登聞檢院諫議大夫

左司諫左正言唐制左補闕左拾遺各六人宋初改為左司諫左正言各一人置諫院知院官以司諫正言充職而他官領者謂之知諫院正言司諫亦有領他職而不預諫諍者元豐更制始皆正名以登聞鼓

院錄司

給事中唐肅宗寶應元年以給事為理憲使五代仍置給事中宋置四人分治六房掌讀中外出納及判後省之事若政令失當除授非人則論奏而取正之故事詔旨付銀臺司封駁元豐更制給事中始正其職而封

駁司路門下通進司進奏院俱隸給事

起居郎唐置二人五代因之宋置一人掌記天子言動元豐六年詔與起居舍人分記言動元祐元年仍詔不置

符寶郎唐制四人掌天子八寶五代因之宋置二人掌外庭符寶之事而禁中則有內符寶郎

臣等謹案唐制弘文館典儀城門郎皆屬于門下省考宋代官制校書郎掌昭文館圖書隸祕書監別置閣門使

皇城司無所隸屬元祐間以詔令稽留吏員冗多徒為重複議廢門下省後雖不行然散騎常侍多不置人唯給

事中仍司封駁之職云

中書省

中書令唐至德以後為勳臣加官不輕授五代時幸臣多加此職宋制令一人掌佐天子議大政受所行命令而宣之未嘗符拜元豐更制以右僕射兼中書侍郎行令之職南渡以後不置

中書侍郎唐制二人五代時拜中書侍郎即為宰相宋制侍郎一人掌貳令之職參議大政南渡後不置

右散騎常侍右諫議大夫唐肅宗右散騎常侍二人右諫議大夫四人五代亦置此官宋制各一人所掌與門下省同

右司諫右正言

唐置右補闕右拾遺各六人宋初改為右司諫右正言各一人與門下省司諫正言通謂之兩省官高宗南渡詔諫院不隸兩省紹興二年詔並仍舊

中書舍人

唐置應元年以中書舍人為理國使五代亦置中書舍人宋制四人掌行命令為制詞分治六房初為選賢官實不任職復置知制誥及直舍人院為學士對掌內外制元豐更制貽正名判後省之事復詔

中書省置點檢房令舍人通領

起居舍人

唐制二人宋置一人所掌同門下省起居郎

臣等謹案中書省舊列門下省之後宋制事有論奏門下省必先關白中書聽其可否故中書省之任視唐代較重其自中書侍郎遷門下侍郎者雖晉其秩實奪其權也又唐以集賢殿史館屬之中書省宋時館職次于翰林院及屬閣學士之後與唐制亦稍殊焉

尚書省

尚書令

唐制尚書令總領百官高祖武德元年太宗為尚書令自後闕其官不置代宗廣德二年以郭子儀為尚書令固辭不拜後不復除五代為勳臣宰臣加官宋制令一人掌佐天子議大政奉所出命令而行之建

隆以來不除政和二年詔不置宣和七年復置亦無除者南渡後並省

左僕射右僕射

唐制為令之貳令闕則總省事五代仍之宋左右僕射各一人掌佐天子議大政與三省長官皆為宰相之任元豐更制以左僕射兼門下侍郎右僕射兼中書侍郎行侍中中書令事政和中改

左右僕射為太宰少宰靖康元年復舊南渡後不置

左丞右丞

唐制左丞總吏戶禮三部右丞總兵刑工三部五代亦置尚書丞宋制左右丞各一人掌參議大政通治省事以貳令僕射之職舊班六曹尚書下元豐更制升其秩為執政南渡以後不置

左右司郎中員外郎

唐制左司郎中一人員外郎一人右司郎中一人員外郎一人宋如唐制掌受六曹之事而舉正文書之稽失分治省事建炎中詔減左右司郎官二員置中書門下檢正諸房公事二

員次年復舊乾道七年復增右司郎官二人

臣等謹案唐書百官志尚書省居三省之首以太宗嘗為尚書令一代無特拜者唯以僕射總尚書省事六部尚

書分職而統屬焉宋制以僕射行宰相之任而六曹各治其事故宋史職官志列六部尚書于諸卿之首不隸尚書省與初設三省之制異矣徽宗大觀中置議禮局宣和六年置講議司皆在尚書省則一時權設之官也

樞密院

樞密院 唐代宗永泰元年始置樞密院設內樞密院使以宣者為之職掌內外表奏凡奏詔處分則宣付中書門下施行梁改為崇政院更用士人備顧問參謀議後唐莊宗同光元年復為樞密院命宰相兼使又置院

使一人晉高祖天福四年廢樞密院出帝開運元年復置漢隱帝乾祐元年為藩鎮加官旋復置使宋樞密使掌軍國機密出納密命佐天子執兵政元豐更制罷使才置高宗紹興七年復置

知院事 晉天福元年始置知樞密院事宋太宗淳化二年始置知院事與院使不並除熙寧元年院使二人復置知院事一人元豐更制定知院事一人為制紹興四年詔宰臣兼樞密者惟兼知院事

同知院事 周世宗顯德元年設參知樞密院事宋淳化二年始置同知院事二人元豐更制定置同知院事一人

樞密副使 樞密使唐僖宗清泰元年置樞密副使周顯德元年與參知院事並除宋初置副使為樞密使知院事之貳與同知院不並除元豐更制廢副使不置紹興七年復置

簽書院事同簽書院事 宋太宗太平興國中始置簽書院事為權領樞密院南渡後復置簽書院事元豐更制並廢政和

特依執政或以武臣為之

都承旨副都承旨 五代有承旨副承旨以諸衛將軍充宋制掌承宣旨命通領院為太平興國中始置都承旨與副都承旨多用士人參謀議真宗景德後用以吏遞遷熙寧改用儒臣兼領元豐時復用武臣

其後則文武兼用焉

檢詳官編修官計議官 宋熙寧四年始置檢詳官元豐初定用三人後廢元祐四年定編修官以四人為制建炎三年復置檢詳官二人四年置計議官四人紹興三年置編修官二人後復用三人

臣等謹案樞密院掌樞密文書始于唐沿于五代其與中書對持文武二柄實自宋始元豐中言者以唐六典無

樞密使議從省併既乃考定舊制以軍國機務不當分隸有司宜以親信大臣專司其事遂仍置知樞密院事其細務則歸之兵部諸曹為南渡初置御營使以宰臣為之旋以其事歸樞密院機速房開禧後胥以宰相兼使視

元豐之制又一變矣

長春宮使

唐武德二年命太宗鎮長春宮自後凡牧同州者多帶長春宮使梁太祖開平元年廢後唐同光元年復置晉天福四年又廢後不復置

太清宮使

唐德宗興元元年以檢校司徒中書門下平章事李勉為太清宮使唐以後不置

太微宮使

唐與元元年以門下侍郎同中書門下平章事盧翰為太微宮使唐以後不置

建昌宮使

梁開平元年置建昌宮使以博王友文為使所管四鎮兵車稅賦諸色課利後改為建昌宮使以宰臣判其事侍郎為副使梁以後不置

興聖宮使

後唐同光元年以皇子繼岌為興聖宮使判六軍諸衛事唐以後不置

景靈宮使

宋真宗大中祥符五年創建景靈宮命輔臣為使

宣徽院

宣徽南院使北院使

唐末始置宣徽使五代分南北院使宋制分為南北院掌總領內諸司及三班內侍之籍郊祀以先後入敘位顯四年詔位參政樞副同知下元豐更制罷宣徽院以職事分錄省寺而使號猶存哲宗紹聖三年罷自後不復置

延資庫使

梁開平三年置延資庫使多以執政大臣兼之梁以後不置

三司

三司使副使

五代置三司使總掌邦計治四方貢賦之入宋制位亞執政號曰計省清化中置使一人總領三部又分天下為十道在京東者曰左計在京西者曰右計置使二人分掌後又置總計使判左右計事

罷十道左右計使其正使以兩省五品以上及知制誥雜學士充副使以員外郎以上應三路轉運使及六路發運使充元豐後裁歸戶部

鹽鐵使度支使戶部使副使

唐末以重臣兼領鹽鐵度支租庸五代分置鹽鐵使度支使租庸使宋太平興國元年分置三司三部副使各一人通倉運部之事又各置判官三人分掌運案之事孔

目官一人部勾押官一人勾覆官四人元豐更制並廢

臣等謹案宣徽院三司使皆元豐後刪併之官宋史職官志仍分載於樞密院後考五代時宣徽南北院使多遷樞密使宋初宣徽院禮均二府專以待勳舊大臣三司使自五代總計財賦宋制選除執政侍從必先歷錢穀有自度支副使擢知制誥者有先除樞密三司使乃拜樞密使者其職綦重誠不得闕其官而不載也然計省本戶部之職三司分置復無異於戶部諸曹元豐之裁併未嘗不歸畫一而當時論者多言其非便是徒見元豐以後戶部不得其人而不知財用之裕絀不在三司之廢置也平賦通財均量出入擇人以任職蓋戶部已足總其成否則增置三司使亦奚益哉至熙寧中又有制置三司條例司三司會計司權宜立制固不足爲久遠之模也臣等又案唐五代諸使名號不一唐有開稻田使回造使秘書省圖書使梁有天驥使飛龍使莊宅使太和庫使豐德使儀鸞使乾文院使五坊如京使洛苑使宮苑使大內皇牆使西京大內皇牆使武備庫使弓箭庫使閑廐使左右軍巡使教坊使內園裁接使後唐有中門使支度務使內甸使宮苑使武德使捧聖軍使西南供饋使三州搜園籍使莊宅使內園裁接使晉有左飛龍使緣河巡檢使引進使侍衛使作坊使周有尙食使浚江招討使要皆廢置不常不足爲法又五代有山陵使禮儀使鹵簿使儀仗使橋道頓遞使宋有封禪大禮使經度制置使祀汾陰經度制置使奉迎使刻玉使天書扶持使因事設官無常員焉宋有宮觀諸使則皆優禮臣下之虛銜故宋志不載云

翰林學士院

翰林學士承旨

唐元宗開元初置翰林待詔掌四方表疏批答應和文章既又以中書務制乃選文學之士號翰林供奉與集賢院學士分掌制誥書敕二十六年改翰林供奉爲學士專掌內命憲宗元和中復

置學士承旨五代時學士承旨多與謀議宋制學士院承旨不常置以學士久次者爲之

翰林學士知制誥

唐制學士院自諸曹尚書下至校書郎皆得與選入院一歲則遷知制誥未知制誥者不作文書庶次各以其官內宴則居宰相之下五代亦置翰林學士後唐復置護書制學士蓋莊宗

初建號特立此名非故事也宋制掌制誥詔令撰述之事凡他官入院未除學士謂之直院學士俱開他官暫行院中文書謂之翰林樞直孝宗信熙五年更爲學士院樞直後復與翰林樞直互除

臣等謹案唐置翰林學士本在至德以前惟其與三省無所繫屬故鄭志闕而不載今據唐書百官志詳其職守以補鄭志之遺宋初以翰林學士與中書舍人分典內外制誥詔之兩制元豐更制凡職名之不麗于三省寺監者皆從裁革惟翰林學士與諸學士待制猶存舊典

翰林侍讀學士

宋初准置侍讀真宗咸平二年始置侍讀學士二人元豐更制廢學士不置爲侍從以上兼官元祐七年復增學士之號元符元年省去建炎元年詔以侍從官四人充講讀官

翰林侍講學士

宋咸平二年始置翰林侍講學士故事兩省臺端以上兼侍講其由庶官兼者必以特命元豐以後宮觀多兼侍讀南渡後多以臺諫兼之

崇政殿說書

宋仁宗景祐元年始置說書四人日輪二員祇候後爲庶官兼經筵者之稱

臣等謹案侍讀侍講學士及崇政殿說書宋時謂之經筵後乃擇學士侍從有學術者爲侍講侍讀其秩卑資淺而可備講說者則爲說書歲以春二月至端午日秋八月至長至日遇隻日入侍邇英閣輪官講讀元祐間程頤以布衣爲說書范祖禹司馬康以著作佐郎兼侍講皆出于異數不爲常制

觀文殿大學士

唐制大學士四人以象四時宋仁宗慶曆七年始更舊延恩殿爲觀文殿皇祐元年置觀文殿大學士詔今後曾任宰相乃得除授

觀文殿學士

宋初置文明殿學士慶曆七年改爲紫宸殿學士尋又改爲觀文殿學士非曾任執政者不除

金鑾殿大學士

梁太祖乾化元年置金鑾殿大學士一人命崇政院使敬翔爲之梁以後不置

資政殿大學士

宋景德二年置資政殿學士在翰林學士下尋置資政大學士班文明殿學士下翰林學士承旨上仁宗康定中大學士置一人學士置二人

端明殿學士

後唐明宗天成元年始置端明殿學士在翰林學士下以待學士之久次者亦以前執政爲之承明殿爲端明殿復置端明殿學士在翰林學士下

諸閣學士直學士待制唐元和二年置御書院學士直學士皆用五品初永徽中高宗命弘文館學士一人日侍
開以李太宗御書置直學士學士待制其後沿爲定制天章閣以奉真宗御製寶文閣以藏仁宗御集顯謨閣以
藏神宗御集徽猷閣以藏哲宗御集學士待制亦兼設焉南遷後復置敷文閣藏徽宗御製後又增煥章
閣華文閣寶謨閣寶章閣顯文閣以藏高宗孝宗
光宗靈宗理宗之御製並設學士直學士待制

臣等謹案大學士之稱始于唐中宗景龍中至德以後如楊綰裴度皆加弘文館大學士李勉裴垕李德裕皆加
集賢殿大學士自宰相而下固不輕授之矣宋時觀文殿資政殿大學士以待宰執之就閒者與閣學士直學士
待制並稱侍從焉

集英殿修撰唐置集賢殿修撰官宋初仍唐制政和
六年始置集英殿修撰下待制一等

右文殿修撰唐置集賢殿學士宋紹聖二年易集賢殿學士爲修撰
政和改爲右文殿修撰與集英殿修撰爲貼職之高等

祕閣修撰宋政和六年置以待館閣之
實深者多自直龍圖閣遷授

直閣宋祥符九年始置直閣凡館閣久次者必選直龍圖閣爲權待制之漸南渡後
直閣爲庶官任藩閫監司者貼職隨高下而等差之直天章閣至顯文閣並同

直祕閣唐制弘文館有直館集賢院有直院史館有直館宋初以史館昭文館集賢院爲三館皆寓崇文院太宗
端拱元年詔就崇文院建祕閣置直祕閣直館直院謂之館職以他官兼者謂之貼職元豐更制廢崇文

院爲祕書監列爲職事官罷直館
直院之名獨以直祕閣爲貼職

臣等謹案宋初以三館爲儲材之地直館直閣皆謂之館職仁宗天聖中修史卽以三館祕閣校理編修元豐以
後館閣盡爲貼職史局無定所修史無定員而三館職事悉歸諸祕書監

東宮官

太子太師太子太傅太子太保唐制各一人官不備五代多爲加官宋初不常置後多以待宰相
未及健壯者及樞密使致仕官隨高下除授習至太師卽遷司空

太子少師太子少傅太子少保

唐制各一人五代亦為加官宋景德中始置太子三少後為前執政致仕官惟少師非特命不除南渡多以宰相兼少師少傅

太子賓客

唐制置四人五代亦置太子賓客宋至道元年初置二人以他官兼之後以執政兼領南渡後不設開禧三年復置

太子詹事

唐制詹事一人少詹事一人宋景德中置詹事二人以他官兼乾道七年以直學士待制為太子詹事不兼他官

左庶子右庶子左諭德右諭德

唐置左庶子二人左諭德一人右庶子二人右諭德一人宋景德中庶子諭德各二人南渡後各置一人開禧中始並置又有主管左右春坊事二人以內臣

兼同主管春坊事以武臣兼承受官一人以內侍充

太子侍讀侍講

唐置侍讀一人宋置侍講各一人

中舍人舍人

唐置中舍人二人舍人四人宋各置一人或二人

資善堂翊善贊讀直講

唐置左右贊善大夫各五人宋設資善堂自仁宗為皇子時肄業之所每皇子就外傳選官兼領南渡後增置設書皇子宮小學教授資善堂小學教授

家令寺家令

唐置家令一人掌太子出入及財賦之事率更寺選一人從寺饒一人五代宋不置

率府

唐置東宮虞衛官有左右衛左右司禦左右清道左右監門左右內並置率府及副率宋承唐制官存而無職司南渡後惟以監門率府副率為環衛官

臣等謹按唐時東宮設官詳備左春坊以比門下省右春坊以比中書省又嘗改司經局為桂坊比御史臺宋代儲闈之建隨宜制官多用他官兼領景德中以丁謂兼少師馮拯兼少傅曹利用兼少保東宮三少始備其官紹興後復增置說書教授以廣輔導然如中允洗馬諸職一代未嘗置官視唐制為簡云

吏部

吏部尚書

唐置尚書一人五代如唐制宋因之掌文武二選曰尚書左選尚書右選文臣自京朝官武臣自大使臣以上選授封爵功賞課最所錄官分掌其事而總于尚書

吏部侍郎

唐置二人五代如唐制宋因之分左右選侍郎左選掌文臣之法改官者侍郎右選掌武臣之未升朝者皆定其選授注擬之法

吏部郎中員外郎唐制郎中二人員外郎二人宋制郎中員外郎各置四人分向左右侍左侍右參掌選事

司封郎中員外郎唐制郎中員外郎各一人掌因之掌官封叙贈承襲之事

司勳郎中員外郎唐制郎中一人員外郎二人宋各置一人掌勳賞之事紹興元年併以司封官兼領

考功郎中員外郎唐制郎中一人員外郎亦一人宋因之掌文武官選叙勳賞任考課之政令

戶部

戶部尚書唐置一人五代如唐制宋太祖建隆時止置判部事一人以兩制以上元置更制始置尚書一人掌軍國政用以屬知其出入盈虛之數

戶部侍郎唐制二人五代如唐制宋因之爲尚書之貳

戶部郎中員外郎唐置郎中二人員外郎二人亦分曹治事

度支郎中員外郎唐置郎中一人員外郎一人掌天下租賦物產豐約至德以後多以大臣判度支宋置郎中一人員外郎各二人參掌計度軍國之用

金部郎中員外郎唐置郎中一人員外郎一人掌天下庫藏出納權衡量度之數

倉部郎中員外郎唐置郎中一人員外郎一人掌天下庫儲出納租稅祿糧倉廩之事

禮部

禮部尚書唐置一人五代如唐制宋初置禮儀院掌其事以樞密院參知政事等官充止設判部事一人元豐更制始設尚書一人掌禮樂祭祀朝會宴饗學校貢舉之政令建炎三年詔鴻臚光祿併歸禮部太常國

子監亦餘焉

禮部侍郎唐置一人五代如唐制宋初掌內殿外學同省性及祠饌醴熟諸禮節元豐更制置侍郎一人紹興七年置二人後復置一人

禮部郎中員外郎唐置郎中一人員外郎一人宋因之參掌尚書侍郎所掌之事

祠部郎中員外郎唐置郎中一人員外郎一人宋因之掌祀典道釋祠廟醫藥之政

主客郎中員外郎唐置郎中一人員外郎一人宋因之掌二王後及諸藩朝見之事

膳部郎中員外郎唐置郎中一人員外郎一人宋因之掌陵廟之牲豆諸司供奉之事

兵部

兵部尙書唐制一人五代如唐制宋初設判部事一人以兩制充元豐更制設尙書一人掌兵衛義仗鹵簿武舉民兵廂軍番軍番官承襲之事與馬器械之政天下地土之圖建炎三年詔衛尉寺併歸兵部

兵部侍郎唐置二人五代如唐制宋因之紹興後止置一人爲尙書之貳

兵部郎中員外郎唐置郎中二人員外郎二人宋各置一人參掌本部長貳之事

職方郎中員外郎唐置郎中一人員外郎一人宋因之掌地圖遠近及番國歸化之事

駕部郎中員外郎唐置郎中一人員外郎一人宋因之掌輿轝車乘傳驛廐牧馬牛雜畜之籍

庫部郎中員外郎唐置郎中一人員外郎一人宋因之掌戎器鹵簿儀仗

刑部

刑部尙書唐置一人五代如唐制宋治化二年置審刑院知院事一人以郎官以上至兩省充大中祥符三年置糾察在京刑獄司二人以兩制以上充元豐更制悉歸刑部置尙書一人掌天下刑獄之政令

刑部侍郎唐置一人五代如唐制宋置二人佐尙書治制勸懲量奏讞糾察錄問之事徽宗崇寧二年詔侍郎一治左曹一治右曹

刑部郎中員外郎唐置郎中二人員外郎二人宋因之分左右廳掌詳覆敘雪之事

都官郎中員外郎唐制郎中一人員外郎一人宋因之掌徒流配隸凡天下役人在京百司吏職皆有籍以考其役放及增損廢置之數

比部郎中員外郎唐置郎中一人員外郎一人宋因之掌旬會內外賦斂經費俸祿賦徒役課程遺欠之物

臣等謹案杜佑通典魏有比部曹隋刑部所屬有比部侍郎一人又案唐六典及唐書百官志刑部所屬有比部郎中員外郎宋史職官志刑部亦有比部郎中員外郎宋以後不置蓋比部之名起於魏至隋始屬刑部而唐宋因之也

司門郎中員外郎 唐置郎中一人員外郎一人宋因之掌門關津梁道路之禁令及廢置移覆之事

工部

工部尚書 唐置一人五代如唐制宋初置判部事一人以兩制以上充元豐更制置尚書一人掌百工水土之政令凡制作營繕計置采伐所用時物按其程式以授有司紹興中以文思院屬工部

工部侍郎 唐置一人五代如唐制宋因之為尚書之貳

工部郎中員外郎 唐置郎中一人員外郎一人宋因之凡營繕計置按程式以授有司則參掌之

屯田郎中員外郎 唐置郎中一人員外郎一人宋因之掌屯田職田及塘濠堤堰修築之事

虞部郎中員外郎 唐置郎中一人員外郎一人宋因之掌山澤苑囿場冶辨其地產而為之屬禁

水部郎中員外郎 唐置郎中一人員外郎一人宋因之掌津濟船塢渠梁溝洫漁捕運漕之事

臣等謹案唐承隋制六部分領四司五代尚書多進平章事或領樞密使宋初以他官兼攝特以寓祿秩品位而已咸平至治間廷臣屢請復二十四司之舊未及施行元豐中討論官制欲采昔時蘇綽建議上自朝廷下至州縣悉分為六曹體統如一其推行之序先自京師始于是六部長貳曹司皆復其職然其時惟除李清臣為吏部尚書安燾為戶部尚書而禮兵刑工四部之長猶未除授乃以謝景溫為禮部侍郎許將試兵部侍郎崔台符為刑部侍郎熊本為工部侍郎司其職守焉又唐制吏部兵部分掌文武銓選而元豐更制則文武之選併歸吏部